



QUARTA SESSIONE STRASURDINARIA DI U 2018

4EME SESSION EXTRAORDINAIRE DE 2018

30 È 31 DI MAGHJU

30 ET 31 MAI 2018

2018/E4/032

*Dumanda à bocca posta da U Sgio Petr'Antone TOMASI
à nome di u gruppu "CORSICA LIBERA"*

Ogettu : Casa territoriale

O sgiò Presidente,

U 1ma di ghjennaghju scorsu, nascia a Cullettività di Corsica. Una cullettività unita chì, per noi astri nazionalisti, deve esse un'arnese da cuncipì è mette in opera politiche più efficiente à prò di l'interessi di tutti i Corsi, di tutta a Corsica.

Essendu ramintata quessa, ognunu hè cuscente chì a creazione di issa nova istituzione intarrugheghja i Corsi, è in particolare quelli chì campanu in i territorii di muntagna è di l'internu, in quantu à a prisenza di i puteri publichi in e so loche è à a presa in contu di i so bisogni.

Dimmula franca, u sistema anzianu di i cunsiglii generali, po dipartimentali, ùn hà mai permessu nè di mantene un equilibriu territoriale, nè d'assicurà a prisenza di u serviziu publicu in i territorii i più scantati da i centri di putere, nemmancu d'inizià una rinascita economica è sociale.

A sfida nostra hè dunque d'invintà un mudellu novu per riduce e fratture territoriale, chì troppu spessu vanu di paghju cù e fratture sociale.

Mentre a campagna di dicembre scorsu, a lista Pè a Corsica hà pigliatu l'ingaggiamentu, davanti à u nostru populu, di rinforzà l'azione di a Cullettività di Corsica in i so rughjoni. E « case territoriale », l'avemu prisintate cum'è una risposta à stu bisognu d'accompagnà a ghjente chì ci campa è d'incuragisce l'iniziative. Porta d'intrata versu di i servizii di a Cullettività per u citatinu, l'elettu locale, l'impresariu, l'attore associativu, e Case devenu garantisce, in fatti, l'accessu à u serviziu publicu per tutti dopu à l'epica di u serviziu resu... Ste Case e vidimu dinù cum'è u locu di scontru trà l'attori di e nostre pieve è l'eletti di a nostra assemblea.

O sgiò Presidente, francata oramai a prima fasa di stallazione di a Cullettività di Corsica, chì metudu è chì calendariu di travagliu site in misura di pruponaci per fà di st'ingaggiamentu di campagna un attu puliticu di a nostra magiurità ?

À ringraziavvi.